

EXD663(EW) (GL)

Adran yr Amgylchedd, Bwyd a Materion Gwledig
Llywodraeth Cymru

Rheoliadau'r Tafod Glas (Cymru) 2008 (fel y'u diwygiwyd) – Rheoliad 10(4)
Gorchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) - Erthygl 5(7)
Rheoliadau'r Tafod Glas 2008 (fel y'u diwygiwyd) - Rheoliad 13(2)

Trwydded gyffredinol ar gyfer symud anifeiliaid o Barth Rheoli Dros Dro y Tafod Glas yng Nghymru i ladd-dy yng Nghymru neu yn Lloegr

Rwyf i, sydd wedi llofnodi fy enw isod, sef arolygydd milfeddygol a benodwyd gan Weinidogion Cymru at ddibenion Rheoliadau'r Tafod Glas (Cymru) 2008 (fel y'u diwygiwyd) a Gorchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) a chan yr Ysgrifennydd Gwladol at ddibenion Rheoliadau'r Tafod Glas 2008 (fel y'u diwygiwyd) [a Gorchymyn Symud Anifeiliaid (Cyfyngiadau) (Lloegr) 2002 (fel y'i diwygiwyd)] yn awdurdodi, yn unol â'r amodau a ddisgrifir yn y Rhestr isod, symud anifeiliaid o Barth Rheoli Dros Dro y Tafod Glas yng Nghymru i ladd-dy yng Nghymru neu yn Lloegr.

Daw'r Datganiad hwn i rym o 17:00 ar 03 Hydref 2025

Arolygydd Milfeddygol

Llofnodwyd gan: Karim Hachimi

Amser a Dyddiad: 17:00 03/10/2025

Arolygydd Milfeddygol a benodwyd gan Weinidogion Cymru a'r Ysgrifennydd Gwladol.

Rhestr o'r Amodau

Rhaid i unrhyw berson sy'n symud anifail o dan awdurdod y drwydded hon gydymffurfio â'r amodau canlynol.

1. Bydd anifail yr awdurdodir ei symud gan y drwydded hon yn cael ei symud o safle o fewn Parth Rheoli Dros Dro y Tafod Glas yng Nghymru yn uniongyrchol i ladd-dy yng Nghymru neu yn Lloegr.
2. Ni chaniateir symud anifail o dan y drwydded hon os yw'r safle y symudir yr anifail ohono neu safle'r cyrchfan yn destun hysbysiad cyfyngu ar safle'r tafod glas.
3. Rhaid i'r trwyddedai gofnodi'n gywir symudiadau anifeiliaid o'r safle y symudir ohono i safle'r cyrchfan ar y platform symud anifeiliaid perthnasol gan gynnwys rhif adnabod yr anifail.
4. Yn union cyn y symudiad, rhaid i'r trwyddedai neu ei filfeddyg preifat archwilio unrhyw anifail sy'n cael ei symud o dan awdurdod y drwydded hon am arwyddion clinigol o haint y tafod glas. Os bydd anifail a archwilir neu anifail arall yn yr un safle yn dangos arwyddion a allai fod yn arwydd o haint y tafod glas, ni chaniateir symud unrhyw anifail o'r safle hwnnw o dan y drwydded hon. Dylid ynysu'r anifail sy'n dangos yr arwyddion oddi wrth weddill y fuches/diadell. Rhaid i chi roi gwybod i APHA ar unwaith os amheuir bod achos o'r tafod glas.
5. Rhaid i'r trwyddedai sicrhau, yn union cyn llwytho'r anifeiliaid, fod gofynion amod 7 wedi eu bodloni.
6. Ar ôl dadlwytho anifeiliaid, a chyn i'r cerbyd adael safle'r cyrchfan, rhaid i'r trwyddedai sicrhau bod gofynion amod 7 wedi eu bodloni.
7. Y gofynion y cyfeirir atynt yn amodau 5 a 6 yw:
 - a) Bod rhan y cerbyd lle delir yr anifeiliaid yn cael ei glanhau'n ddigonol, gan sicrhau ei bod yn rhydd o ddeunydd organig a allai ddenu gwybed, cyn ei thrin yn unol ag is-baragraff b.
 - b) Rhaid i ran y cerbyd lle delir yr anifeiliaid fod wedi ei thrin â phryfladdwr yn unol â'r label.
 - c) Rhaid gadael i unrhyw bryfladdwr a ddefnyddir sychu'n llwyr cyn llwytho unrhyw anifeiliaid.
8. Yn unol â'r amodau a ddisgrifir yn Nhrwydded Gyffredinol Gorchymyn Rheoli Clefydau (Cymru) 2003 (O.S. 2003/1966) (Cy211) a Thrwydded Gyffredinol Rheoli Clefydau (Lloegr) 2003 (O.S. 2003/1729) ar gyfer symud gwartheg, defaid, geifr a moch, caniateir stopio yn y lleoliadau canlynol:
 - a. Gorsafoedd petrol ar draffyrdd
 - b. Cilfan swyddogol (ar gefnffordd/priffordd)
 - c. Meysydd parcio i lorïau neu fannau tebyg
9. Rhaid i'r trwyddedai gadw, am gyfnod o 2 flynedd o leiaf, gofnodion o:
 - a. Nifer yr anifeiliaid a symudwyd o dan y drwydded hon,
 - b. Rhifau adnabod yr anifeiliaid a symudwyd o dan y drwydded hon,
 - c. Manylion cywir y safle y symudwyd yr anifeiliaid iddo.
 - d. Unrhyw bryfladdwr a ddefnyddiwyd at ddiben amod 8.
10. Wrth symud unrhyw beth o dan awdurdod y drwydded hon, rhaid i unigolyn gario nodyn cludo. Rhaid i'r nodyn cludo gynnwys:
 - a. Rhywogaeth a nifer yr anifeiliaid sy'n cael eu symud
 - b. Dyddiad y symudiad
 - c. Enw'r cludwr,
 - d. Cyfeiriad y safle y dechreuodd y symudiad ohono (y farchnad neu'r ganolfan gasglu)

- e. enw a chyfeiriad y sawl sy'n derbyn yr anifeiliaid, ac
- f. enw, cyfeiriad a rhif CPH safle'r cyrchfan

11. Rhaid i'r symudiad i safle'r cyrchfan fod yn uniongyrchol, ar briffyrdd cyhoeddus, ac ar y llwybr y bernir sy'n debygol o fod y cyflymaf sydd ar gael.
12. Ni chaniateir casglu na gollwng anifeiliaid ar safleoedd eraill.
13. Amod o bob symudiad yw bod yr anifail wedi'i dagio'n briodol yn unol â'r rheoliadau adnabod da byw cyfredol ar gyfer y rhywogaeth a bod dogfennau symud priodol wedi'u cwblhau yn cyd-deithio â'r anifail. Rhaid i symudiadau gydymffurfio â gofynion gwaharddiadau symud ac adrodd arferol.

Nodiadau

1. Ystyr "y Rheoliadau" yw Rheoliadau'r Tafod Glas (Cymru) 2008 (fel y'u diwygiwyd) (O.S. 2008/1090) (Cy. 116) neu Reoliadau'r Tafod Glas 2008 (fel y'u diwygiwyd)
2. Ystyr "y Gorchymyn" yw Gorchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) (O.S. 2003/399) (Cy. 56) neu Orchymyn Symud Anifeiliaid (Cyfyngiadau) (Lloegr) 2002 (O.S. 2002/3229)
3. Ystyr "anifail" yw anifail sy'n cnoi cil, neu gamelid. Mae anifeiliaid sy'n cnoi cil yn cynnwys gwartheg, defaid, geifr a cheirw, ymhlith anifeiliaid eraill. Mae camelidau yn cynnwys camelod, lamas ac alpacas, ymhlith anifeiliaid eraill.
4. Ystyr "Parth Rheoli Dros Dro y Tafod Glas" yw parth rheoli dros dro a ddatganwyd o dan reoliad 10(1) o Reoliadau'r Tafod Glas (Cymru) 2008 (fel y'u diwygiwyd) (O.S. 2008/1090) (Cy.116) ac ardal reoli dros dro a ddatganwyd o dan Erthygl 5(1) o Orchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) (O.S. 2003/399) (Cy. 56).
5. Ystyr "trwyddedai" yw'r person sy'n symud anifeiliaid o dan y drwydded hon.
6. Nid yw'r drwydded hon yn drech nag unrhyw gyfyngiadau symud eraill ar anifeiliaid o dan ddeddfwriaeth arall.
7. Nid oes angen cynnal prawf cyn symud ar anifail sy'n bodloni amodau'r drwydded hon cyn iddo adael Parth Rheoli Dros Dro y Tafod Glas yng Nghymru i ladd-dy yng Nghymru neu yn Lloegr.
8. Nid yw'r gofynion a nodir yn y drwydded hon yn effeithio ar rwymedigaethau'r defnyddiwr o dan Orchymyn Cludo Anifeiliaid (Glanhau a Diheintio) (Cymru) (Rhif 3) 2003 (fel y'i diwygiwyd) (O.S. 2003/1968 (Cy.213)) na Gorchymyn Cludo Anifeiliaid (Glanhau a Diheintio) (Lloegr) (Rhif 3) 2003 (fel y'i diwygiwyd) (O.S. 2003/1724) i lanhau a diheintio'r cerbyd.
9. Rhaid bodloni holl ofynion Gorchymyn Rheoli Clefydau (Cymru) 2003 (fel y'i diwygiwyd) (O.S. 2003/1966 (Cy.211)) neu Orchymyn Rheoli Clefydau (Lloegr) 2003 (fel y'i diwygiwyd) (O.S. 2003/1729) a thrwyddedau o dan y Gorchymynion hynny.
10. Rhaid i berson sy'n symud unrhyw beth o dan awdurdod y drwydded hon roi ei enw a'i gyfeiriad, dangos y nodyn cludo a chaniatáu i rywun wneud copi o'r nodyn cludo neu o ran ohono, os gofynnir iddo wneud hynny gan filfeddyg, arolygydd neu un o swyddogion eraill Gweinidogion Cymru neu'r Ysgrifennydd Gwladol.
11. Rhaid i'r pryfladdwr a ddefnyddir ar gerbydau sy'n cael eu defnyddio i gludo anifeiliaid sy'n cael eu symud o dan awdurdod y drwydded hon fod yn effeithiol yn erbyn pryfed sy'n hedfan, yn ddelfrydol rhywogaethau o'r genws *Culicoides* (gwybed), a rhaid ei ddefnyddio yn unol â chyfarwyddiadau'r gwneuthurwr. Yn ddelfrydol dylai gynnwys y cynhwysyn actif pyrethrin, neu byrethroidau synthetig. Yn ddelfrydol, dylid ei ddefnyddio ar ffurf chwistrell a dylai fod yn addas i'w ddefnyddio o dan do. Rhaid iddo fod wedi ei awdurdodi ar y pryd gan yr Awdurdod Gweithredol Iechyd a Diogelwch (HSE) fel cynnyrch bioladdol i'w ddefnyddio yn y DU.

Dylai'r trwyddedai ddarllen cyfarwyddiadau'r gwneuthurwr ar gyfer defnyddio'r cynnyrch ar gerbyd a ddefnyddir i gludo anifeiliaid sy'n cael eu symud o dan awdurdod y drwydded hon, a chadw atynt.
12. Os ydych chi'n amau bod achos o glefyd hysbysadwy yn Lloegr, rhaid i chi roi gwybod amdano ar unwaith drwy ffonio Llinell Gymorth Gwasanaethau Gwledig Defra ar 03000 200 301. Os ydych chi'n amau bod achos o glefyd hysbysadwy yng Nghymru, rhaid i chi roi gwybod i'r Asiantaeth Iechyd Anifeiliaid a Phlanhigion ("APHA") ar unwaith, ar 03003 038 268.

13. Rhaid cydymffurfio â phob deddfwriaeth berthnasol arall.
14. Cysylltwch â llinell Gwasanaethau Gwledig DEFRA yn Lloegr neu'r APHA yng Nghymru drwy'r manylion uchod neu'ch Awdurdod Lleol (ALLI) i gael rhagor o wybodaeth am fesurau boddigogelwch ac unrhyw ddeddfwriaeth berthnasol arall.

Bydd unrhyw berson sy'n torri unrhyw ofyniad neu waharddiad mewn datganiad a wneir o dan Reoliadau 2008 yn cyflawni trosedd a gall fod yn atebol os caiff ei farnu'n euog i ddirwy lefel 5 ar y raddfa safonol neu i garchar am gyfnod nad yw'n fwy na thri mis neu i'r ddau (yn rhinwedd rheoliad 25 o Reoliadau 2008).

Bydd unrhyw berson sy'n torri unrhyw ofyniad neu waharddiad mewn datganiad a wneir o dan Orchymyn 2003 yn euog o drosedd a gall fod yn atebol os ceir euogfarn ddiannod i garchar am gyfnod nad yw'n hwy na chwe mis neu i ddirwy nad yw'n fwy na lefel 5 ar y raddfa safonol neu i'r ddau (yn rhinwedd adran 72 o Ddeddf Iechyd Anifeiliaid 1981).